

欽定剿平粵匪方略

欽定勦平粵匪方略卷二百五十二

庚申年

九月十七日

丁未

袁甲三奏言定遠逆捻勾結大

股粵逆竄撲鳳陽府縣兩城在龍興寺九華山  
馬鞍山及眉山獨山等處踞險紮營三十餘座  
並於各要隘攔截糧道副將吳秀等激勵兵團  
竭力固守該逆屢次撲城均經城上礮石擊退  
臣又調知縣金汝霖等西路圍練兩面夾擊八

月二十九日穆騰阿親督馬步各隊直衝賊陣副將王才秀等首先殺入賊勢披靡山後旋又繞出賊股拒戰甚力西路練勇趕至該逆分股抵敵兵練屢次衝擊一時未能會合日暮始行收隊臣復派遣員張學醇等於九月初一日夜選帶奮勇銜枚潛至山前擁入賊營該逆猝不及防踉蹌奔逃維時金汝霖亦至青洲營地方

焚燬賊壘一座城上又連開大礮該逆棄營狂奔我軍奮勇掩殺副都統烏勒興阿克蒙額等帶領馬隊由南路抄截於林家橋一帶殲斃淹斃難以數計查我軍自定遠撤退後布置未定該逆遽以大股圍撲鳳陽府縣兩城儘有挫失則上下千餘里防不勝防茲幸該文武等督率兵勇明攻暗襲以寡擊衆轉危爲安謹開列名

單籲懇

天恩優加獎敘奏入

上諭內閣曰定遠擒匪勾結大股粵逆竄撲鳳陽府縣  
兩城副將吳秀等嚴密固守道員張學醇等乘夜往  
攻立解城圍該文武等督率兵練戰守不遺餘力自  
應立予優敘副將吳秀著以總兵記名簡放並賞加  
提督銜參將蔣得遇著以副將補用都司于殿甲著

以參將儘先補用並賞給剛勇巴圖魯名號協領安  
慶阿著賞加副都統銜驍騎校興林著以佐領卽補  
先換頂戴補用道張學醇著賞給堅勇巴圖魯名號  
並賞加按察使銜參將伊米陽阿著賞加副將銜宋  
慶著以副將補用署鳳陽府知府秦榮著以道員記  
名簡放並賞加鹽運使銜署鳳陽縣知縣高啟林著  
以同知直隸州知州補用守備黃國瑞著以遊擊補

川楊萬林著賞換花翎把總方淮澄著賞戴藍翎都司馬培基遊擊王新桂均著以參將補用守備唐舉著以都司補用以示鼓勵其餘在事出力人員並定遠案內存記各員均著准其彙案請獎

袁甲三又奏言臣接翁同書函稱粵捻大股由延遠竄踞鑑橋傳言來攻壽州業已布置嚴防臣查該逆合股爲數甚衆且久有赴援懷桐之

說恐我軍截其後路姑先假道壽州亦未可定  
惟臣營距壽將近三百里水陸閒隔呼吸未能  
靈通現在鳳陽甫經解圍布置正關緊要壽州  
旣形喫重則懷遠以上必須嚴密防堵以遏旁  
竄當飭駐防懷遠之參將成桂集練分布並派  
參將許保清管帶礮船三十隻駛赴懷遠以上  
清理河道遙爲壽州聲援奏入報



同日翁同書奏言八月二十五日四眼狗陳逆  
大股馬步萬餘圍撲鑪橋我軍據營固守槍礮  
齊施擊斃騎馬賊不計其數尹善廷親督弁勇  
突出營牆大呼奮擊千總吉玉成槍斃黃衣騎  
馬賊目一名該逆始行驚潰我軍隨後追殺至  
十里廟因天晚收隊二十六日賊復分路來圍

層層密布牽掣我軍不能出營遂於正東大路  
旁紮營四座又由東南繞至對岡連營五座是  
夜該逆恃衆圍撲各營衆寡懸殊萬難抵敵而  
賊又分股撲我河西營壘尹善廷等見腹背受  
敵祇得突圍而出且戰且退以固壽城根本臣  
派參將吳峻基帶川勇四百名扼東津渡紮營  
將前敵兵勇分布城外並調副將黃鳴鐸礮船

嚴扼東津渡水道與陸營互相犄角而自率城內文武登陴固守正在布置閒賊匪已於馬廠集一帶連營數十座二十九日賊撲東津渡副將黃鳴鐸督率礮船擊退九月初一日陳玉城親率馬隊數千步隊萬餘人揚言紮筏搶渡臣飭總兵慶瑞親帶步隊多備槍礮前赴東津渡協同黃鳴鐸將賊擊敗該逆大隊循山而北臣

督同兵練嚴守北門賊偏近北關集縱火旋即  
大股臨河直撲橋口臣督兵開礮打入賊隊傷  
斃無數賊分爲二隊一越蔡家岡北走一循北  
關集西行直至淮河南岸臣飛調礮船沿河追  
擊直至申刻始行收隊回紮隗家店蓮花塘等  
處尋探東津渡等處賊匪聯木編葦成筏數百  
急圖搶渡臣親往東津渡收民船漁船於西岸

懸以礮船旗幟藉張聲勢初三日賊筏結成浮橋三座適西風大作黃鳴鐸派得力弁目駕駛礮船冒風而進往來堵擊斃賊極多臣復調參將吉學盛等各帶擡礮鳥槍排列河干以禦之賊不能渡初四日水師礮勇一擁登岸將賊擊退三里許黃鳴鐸因賊勢過衆戒勿窮追立將浮橋三座焚燬賊匪爲之氣奪然仍死踞渡口

列營數十里不退查陳玉城率二十餘萬衆窺伺壽州臣以飢軍撐拄其閒已屬萬分危險況鳳陽被圍與袁甲三一軍聲息中斷而孫姜等股又由光固竄至霍六境內廬舒粵逆亦乘隙圖擾六安各路紛紛告急六安有防兵三千臣復調署守備趙春和團練數千赴該州協勦另調牛允恭等練丁隨同烏爾滾布馬隊駐守正

陽關以通餉道當此四面受敵實覺防不勝防  
豫省協餉二萬兩杳無信息衆兵飢寒交迫枵  
腹荷戈豈能督之趨死若豫餉再遲十日不到  
則壽州必致失陷且恐竄擾豫疆大局愈壞仰  
懇

天恩嚴飭河南藩司賈臻迅撥全餉以救跼危並

飭山西陝西二省照數按月撥解則臣軍幸甚淮南幸

甚

翁同書又奏言荊州將軍都興阿統帶馬隊於九月初四日由六安行抵壽州適值賊匪圍攻壽城迤東一片賊氛道途梗阻帶來步隊亦尙未到現在城外暫駐藉壯聲威俟後隊到齊道路稍通再行前進奏入

上命軍機大臣傳諭都興阿翁同書曰據翁同書奏粵



逆大股圍攻情形危急該將軍現經行抵壽州卽著  
協同翁同書將此股粵逆擊退蘇常諸賊時思北竄  
江北地方更爲喫緊著俟道路一通卽統帶馬步隊  
迅赴揚州一帶督同李若珠等嚴密防守翁同書督  
率諸軍連日雖獲小勝該逆尙未遠颺著激勵將士  
實力防剿以保危城本日袁甲三奏稱鳳陽已經解  
圍派參將許保清管帶礮船駛赴懷遠遙爲壽州聲

援該撫請催協餉之處已嚴諭河南及山陝兩省迅速撥解矣

上又命軍機大臣傳諭賈臻常績譚廷襄曰本日據翁同書奏粵逆陳玉城率衆二十餘萬竄踞鑑橋進撲壽州雖連日扼渡堵剿奪獲浮橋該逆仍列營數十里不退西捻孫姜等股又由光固竄至霍邱六安境內應舒粵逆亦乘隙圖擾六安各路防不勝防衆兵

飢寒交迫豫省協餉尙無信息若再遲十日不到壽  
州必至失陷等語此次粵逆糾合捻逆圍撲壽州萬  
分危險翁同書以飢軍撐拄其閒萬一不支該逆必  
竄入豫疆大局愈壞著賈臻無論何款內先行籌撥  
數萬兩解往翁同書大營以拯阽危毋得坐視不救  
其山西陝西二省應解壽州軍餉並著常績譚廷襄  
迅卽按月撥解以濟要需

十八日

戊申

李若珠奏言八月二十六日賊船二

百餘號由諫壁丹徒各口分竄江面副將李新  
明等各帶戰船用大礮擊壞賊船多隻並斃黃  
衣賊目二名賊卽退回九月初一二等日賊衆  
二三千人列於丹徒之土山意欲紮營並在江  
濱放火我軍防範愈嚴初三日丹徒諫壁新豐  
各口賊船一千餘號順流放出竟將所釘木椿

衝散李新明排定槍礮待其船出而後擊之又密令小划船十餘隻潛行上岸豫伏叢蘆中該逆連檣出撲我軍槍礮齊施李新明親駕快蟹船先將該逆歸路截斷岸上伏兵四起賴鎮海鞠耀乾又各駕師船馳到賊衆紛紛投水淹沒無遺是日計奪獲賊船八十餘號糧米食物三千餘斤火藥鉛彈旗幟器械甚多初六日總兵

吳全美李德麟等來見據稱奉曾國藩批飭令  
全部戰船帶往江南由臣分撥防守所有大小  
紅單快蟹長龍等船一百八十餘號均已到齊  
臣思江防正在喫緊驟添此起師船北岸人心  
稍定卽當與總兵黃彬細心籌度擇要分泊不  
使稍有疏虞惟查該船勇丁口食每月約需二  
萬餘兩應請

旨飭令喬松年江清驥迅速籌給

李若珠又奏言接總兵黃彬函稱自八月十九日帶船駛赴下游當於南岸各口派船駐守一面多釘木椿嚴防竄突並整頓團練協同堵禦九月初三日江陰逆匪由內河駕駛木鐸上載乾柴火藥意欲撲我師船礮船數十隻接踵而至副將郭定猷親督礮划勇壯先行登岸以火

箭射之燃著木簞火藥又值木椿釘住賊船不能進退都司李得祿等各帶隊伍繞過君山截其歸路知縣齊在鎔等各帶兵勇兩路包抄賊往常熟大路奔竄李得祿等由北門攻入齊在鎔等由西門攻入殲斃悍賊二百餘名立將江陰縣城克復並擒僞丞相李添壽等正法臣思江陰旣已克復而常熟福山常州等處皆賊非



有重兵萬難守禦臣所部揚防一軍疊次派援  
上海鎮江無從抽撥現在鎮城之賊業已遠颺  
兵力較揚防稍厚應請

旨飭令巴棟阿抽出一軍迅往江陰駐紮臣亦當添派  
師船協力防守庶爲規復南岸地步奏入

上命軍機大臣傳諭巴棟阿李若珠江清驛喬松年曰  
此次賊船千餘號經參將李新明等督軍截擊大獲

勝仗具江陰逆匪復經黃彬督令副將郭定猷等焚  
燒木簾杜截歸路將縣城克復勦辦甚爲得手軍務  
大有轉機惟江陰旣已克復而常熟福山常州等處  
皆賊非有重兵駐紮萬難守禦據該提督奏鎮江業  
已解圍著巴棟阿卽於大營內抽出一軍飭令迅赴  
江陰屯守旣與鎮城互爲犄角亦可爲規復南岸地  
步至吳全美李德麟等師船業經駛赴下游兵力已

厚卽著李若珠督同黃彬飭令擇要分汨務使與南岸鎮江江陰等處陸兵互相聯絡嚴密巡防毋令賊船北竄此項水師糧餉著江清驥喬松年於南北兩臺中會同籌款放給不准互相推諉致有缺乏都興阿一軍業已行抵壽州昨諭令其統率馬步隊馳赴江北該將軍一到軍威益振巨寇不難蕩平矣

十九日 己酉 巴棟阿奏言九月初一日逆匪大股

環城攻撲臣親督官兵守禦西南二門總兵馮子材等扼守東北兩門復派參將錢朝舉等分扼要隘並令總兵賴鎮海等督飭艇師力扼江面各口一面派總兵馮日坤等各帶所部出城奮力攻擊以遏兇鋒臣與馮子材仍不時周歷巡察揮令兵勇近以槍擊遠以礮轟斃賊甚衆該逆至晚不退而金陵賊匪復至石埠橋高資

一帶併力圖攻次日賊隊環山徧野更番圍撲復有悍賊負梯直前冒煙而進槍彈火箭拋向城頭我軍鎮靜固守城上齊開大礮並放擡礮鳥槍水師亦槍礮環擊賊勢稍卻滕嗣林等乘勢率隊追殺大獲全勝生擒長髮賊匪數十名逆勢不支退伏山後初三日賊匪退竄丹陽馮子材督隊疾趨追過丹徒鎮包家岡一帶斬擒

甚衆至晚收隊回城計獲賊船二百餘隻羸馬輜重頗多是日李新明督勇登岸攻勦丹徒鎮賊衆亦獲勝仗逆匪落水淹斃暨砍死者無算奪獲賊划七十二隻詢據難民供稱逆首李侍賢率黨四萬餘人志在攻破鎮江因我防守嚴密並斃賊目多名逆膽始寒退回蘇常等語臣查此次逆黨兇悍日夜環攻情形危險又值餉

集賢堂 卷三十三 十一  
需久缺兵勇大半無衣迫於飢寒深慮軍心不  
固臣與在事員弁晝則督隊擊賊夜則親歷周  
巡勦力同心嚴守七晝夜之久幸能獲勝解圍  
保此危城馮子材調度有方應如何

特予獎擢之處伏候

聖裁其餘出力將弁兵勇可否擇尤保奏出自

鴻施奏八

上諭內閣曰此次逆首李侍賢率黨四萬餘人攻撲鎮城勢甚兇悍巴棟阿等率同文武嚴密防守經七晝夜之久同心戮力得保危城殊堪嘉尙提督銜西甯鎮總兵馮子材前經薛煥以赴援金壇不力奏參革職留營此次調度有方尤爲出力著加恩開復原官並免其查辦其餘出力將弁兵勇著該署將軍查明保奏



巴棟阿又奏言 臣前奉

諭旨常昭失守飭令相機規復茲鎮城幸已解圍 臣遵  
與馮子材商派勁旅二千三百餘名交副將馮  
日坤管帶拔隊前往聽候龐鍾璐調遣會合民  
團迅圖克復其沿江各處要口亦經 臣嚴飭各  
該地方文武察看形勢密釘木椿將口門堵塞  
堅固以免賊船偷渡奏入報

聞

二十日庚戌薛煥奏言本年三月二十九日逆匪

圍攻金壇縣城數日卽被擊退閏三月閒賊黨  
數萬復來圍攻經署知縣李淮會同已革總兵  
蕭知音參將艾得勝周天孚督飭兵民分段防  
剿屢次獲勝無如該逆四面合圍日聚日衆因  
無一兵往援以致糧藥俱盡力難抵禦於七月

十六日城陷知縣李淮同參將艾得勝周天孚  
均登時被害並聞蕭知音及其餘文武員弁亦  
同時殉難臣查該逆圍攻金壇縣城至一百餘  
日之久內斷糧藥外無援兵各該文武猶能勦  
力同心嬰城固守迫勢莫能支城陷被害想見  
一片忠忱歷險彌堅仰懇

天恩俯准將同知銜署金壇縣知縣李淮參將艾得勝

周天孚

加贈升銜

飭部照銜從優議卹以慰忠貞奏入

上諭內閣曰本年閏三月逆匪糾黨數萬圍逼江蘇金壇縣城經署知縣李淮會同參將艾得勝周天孚督同文武兵民嬰城固守一百餘日之久屢卻賊匪以外援不至城陷陣亡殊堪嘉憫同知銜署金壇縣知

縣李淮著從優追贈道銜照道員陣亡例議卹儘先  
參將艾得勝周天孚著從優追贈總兵銜照總兵陣  
亡例議卹以慰忠魂其餘文武員弁下落仍著薛煥  
查明具奏

同日翁同書奏言粵逆陳玉城率悍賊二十餘  
萬圍攻壽州臣親至城上相度形勢激勵兵練  
固守賊衆聯營櫛比占踞村莊由東淝河起至

石頭埠周圍七八十里絕我樵採因見城中鎮  
靜無懈可擊遂於姚家灣搶奪民船思由水路  
來攻壽州並犯正陽關臣先派都司彭楚文帶  
礮船二十隻駛至姚家灣奪賊船十餘隻救出  
民船二十餘隻賊計遂不得行九月初六日賊  
匪乘霧泅水入小港掠奪民船經守備黃廣仁  
等駕駛戰艇突前圍擊殺賊百餘名復有賊騎

數百引步隊數千直撲北關勢甚猖獗臣親督  
總兵慶瑞等率兵堵禦並派水師渡河登陸槍  
礮齊施刀矛並舉斃賊百餘名船上及城頭皆  
發礮應之賊衆披靡折回兩河口尋在東津迤  
南紮一木筏乘坐二千餘人復圖搶渡副將黃  
鳴鐸募敢死之士數百人盡力轟擊賊匪撲河  
溺死者無算是夜又有賊匪潛蹤涉淺而至城

上開放槍礮並滾木撞石斃賊多名臣復密令  
水勇於三更時渡至山麓五里廟地方縱火焚  
死賊匪無數餘匪驚擾退竄自相蹂踐臣飭各  
營過河追躡沿途掩殺及至天明賊已遠遁黃  
鳴鐸遣水勇登岸追斬黃衣騎馬賊目一名餘  
衆四散奔潰臣復派銳卒追殺數十里斬獲數  
百生擒長髮賊數十名城圍立解臣查壽城東



西北三面襟帶淮淝尙據形勝惟南路平衍無險可扼今賊雖退走難保不繞過淝水由南路瓦埠三覺寺一帶攻撲壽州其正陽地方雖有團練馬隊駐守尙恐兵力未厚飭令黃鳴鐸速帶水師前往協防至此次以陳玉城之兇悍率衆二十餘萬攻城十日得保無虞皆由文武員弁兵練紳民齊心合力而尤得力於東津渡一

營及水師礮船所有在事出力之總兵銜潼關  
協副將黃鳴鐸應請

旨記名以總兵用其餘員弁均屬著有勞績可否容臣  
查明保奏以爲力守危城者勸奏入

上諭內閣曰此次逆匪率衆二十餘萬圍攻壽州十日  
勢甚兇悍該文武員弁等合力齊心嬰城固守得保  
無虞均屬著有勞績其尤爲出力之總兵銜潼關協

副將黃鳴鐸著交軍機處記名以總兵用其餘在事出力之文武員弁兵練紳民著翁同書查明保奏

二十一日 辛亥 曾國藩奏言查甯郡失守案內 臣

奏明僞英王陳玉城帶大股悍賊屯踞甯國縣旋又探得踞甯邑者非陳玉城乃僞侍王李侍賢也八月十八日由胡樂司竄叢山關及樓下各隘口皖南道李元度於十六日帶勇三千抵

徽接防聞警卽派兵由績溪前進十九日出隊  
分路進剿一走叢山關一走樓下肅字營營官  
同知童梅華督隊猛擊賊敗該營追出關外伏  
賊突起從嶺尖翻下包抄我後童梅華身受槍  
傷登時陣亡弁勇傷亡百餘人平字營將到樓  
下斃賊百餘正酣戰閒聞肅字營失利而止是  
夜閒道趨回賊乘勢竄過績溪張運蘭嶺外旌

德之軍與李元度嶺內徽軍中閒已被賊隔斷  
矣二十一日張運蘭探知大股賊進踞楊溪一  
帶派兵從中邀擊斃賊馬數十匹悍賊一千餘  
名賊紛紛潰走墜巖落澗死者無算追過板橋  
收隊次日仍回旌德臣因徽州賊勢浩大李元  
度兵力甚單先由祁門抽派禮字河溪各營二  
千餘人倍道馳援飭於徽城外堅築濠壘以靜

制動乃李元度以賊偪城下逐日出隊搦戰修築不及營壘未成賊已大至二十四日僞侍王李侍賢同諸逆首共帶四萬人直撲徽城李元度親督各營出城接仗衆寡不敵禮字河溪各營由西門大路退回休甯李元度率平江四營入城固守賊卽跟蹤圍攻西門李元度身臥城頭竭力堵禦二十五日申酉之間賊伏西門民

房鑿牆對城施放火槍守陴弁勇站腳不住賊  
衆卽緣梯直上李元度趕調各門隊伍來救賊  
已四面登城而入府城遂陷迄今十日因賊氛  
阻隔尙未聞李元度下落臣自接李元度圍城  
中飛書求救卽調張運蘭由旌德入援鮑超由  
太平入援無如城大而圯兵勇僅二千有奇不  
敷分布又係新募之卒甫經到徽竟不能支持

數日以待援師實堪痛惜臣調度無方咎無可辭應請

旨將臣交部議處現在各股悍賊盤踞徽郡休甯及嶺

外旌涇太石各縣有分竄浙江上犯祁門之意不得已檄調鮑超回駐漁亭張運蘭回駐黟縣以遏狂寇而定人心並咨商左宗棠迅督所部赴樂平婺源一帶以防徽州竄江西之路俟賊



勢稍定再行合力進剿奏入

上諭內閣曰徽州失守曾國藩未能先事豫防著交部議處仍著鮑超張運蘭等迅速進兵力圖克復李元度及圍城文武下落著該大臣查明具奏

二十四日甲寅瑞昌王有齡奏言據趙景賢稟稱

由平望竄踞南潯之賊經附近兵團合力追逐該逆遁回平望湖防又得暫安惟廣德未復甯

國又失仍有兩面受敵之勢臣等前派援湖之副將陳步高因病未能拔隊已改派都司劉洪海等帶勇一千五百名歸趙景賢調遣以資防禦其占踞嘉善平湖之賊時出竄擾米輿朝會同錫齡阿進攻平湖八月二十日分路前進直薄城下知縣汪元輯亦督團繼至賊拌死抵拒我軍乘勝攻入當將平湖縣城收復先是臣等

卷之三十三  
派副將劉芳貴進紮海鹽彭斯舉駐海甯吳再  
升紮石門馬德昭一軍亦遵

旨令由平善赴援上海今平湖已復卽飭各軍進攻嘉  
善會勦嘉興壘據於潛等縣稟報甯邑獅橋賊  
匪四山焚掠離千秋關僅五里而甯郡之賊分  
股竄至旌德且績溪歙縣亦有賊蹤並有直撲  
徽郡之說是於潛昌化淳安處處喫緊均請撥

兵防堵臣等飭都司劉仁福帶勇二千餘名前  
赴千秋關相機堵剿又飭副將周萬遠督帶所  
部由甯陽馳赴漕安兼派守備陳永椿等管帶  
礮船水陸分防以壯聲威而杜竄越其副將余  
永椿一軍已先由曾國藩派令援浙臣等亦令  
赴漕安扼紮惟曾國藩大營如道員張運蘭副  
將宋國永各隊已出勦旌太等處徽郡實形空

虛因思江長貴雖屢經挫衄而熟悉徽防情形  
現擬咨派該提督統領原部回援徽州一轉移  
閒必能得力

瑞昌王有齡又奏言據探續溪之賊竄徧徽州  
卽於八月二十五日失守二十六日賊到蔡塢  
章洪一帶離淳邑交界二十里杭嚴二郡徧近  
徽州昌化之昱嶺淳安之威坪尤爲喫緊臣現

派副將周萬遠督隊赴淳安其署總兵曾玉明  
所帶閩兵三千名已有抵衢之信飭令暫駐嚴  
州相機堵剿惟昌化一路並未設防適接江長  
貴函稱該提督患病甚重擬來杭就醫是援徽  
保浙均不足恃且獅橋之賊未退劉仁福一軍  
不便撤動千秋關係防堵甯國一路徽屬與昌  
化交界之處尙多恐劉仁福力難兼顧不得已

擬令馬德昭暫緩赴滬仍紮長安以備緩急張  
玉良傷尙未愈咨令統帶所部由桐廬嚴州  
帶步步進紮以扼兇鋒所有嚴州一路官兵聽  
其調度惟前此浙省獨當嘉蘇一面已覺喫重  
今徽甯連陷一片烽煙實有面而受敵之勢惟  
有共矢血誠力圖守禦奏八均報

二十五日

乙卯

毓科奏言甯國徽州相繼淪陷饒

州一帶緊接皖疆必須調回援浙各軍方足以  
資堵剿因思現在逆勢趨重皖南浙省軍情計  
可稍緩除前派援浙之副將文瑞等四營防守  
杭垣應仍暫留協防外其道員彭斯舉平江五  
營副將劉芳貴寶後等三營遊擊劉長培固勝  
營業經咨令兼程回江援剿誠恐浙省軍務未



竣留而不遣必致貽誤江西全局應請

旨飭下浙江撫臣一體飭催以期迅速而免稽延奏入

上命軍機大臣傳諭瑞昌王有齡曰甯國徽州相繼淪陷饒州一帶緊接皖疆必須調回援浙各軍方足以資捍禦浙省軍務現在情形稍鬆所有江西援浙各軍除文瑞一軍仍留防守省垣外著瑞昌王有齡飭令道員彭斯舉副將劉芳貴遊擊劉長培等各率所

部兼程回江援勦毋得稽延致誤江西全局

同日劉長佑奏言逆匪石達開自慶遠潰往武  
緣餘黨數萬人分爲兩旗八月初四日竄至興  
安署知縣榮志與蔣顯敷率勇迎戰該匪拌死  
拒撲衝入縣城蔣顯敷陣亡榮志受傷墜馬爲  
賊擁去時副將鄢世堂等督軍疾追賊向麻子  
渡紅石源狂奔唐應瑞錫敬等夾擊先後殲擒

數千人鄢世堂等追至道州該匪已爲楚師所破分別勦撫殆盡振旅而還桂林全境肅清所有投誠人等經署鹽法道蘇鳳文等分起遣遞回籍酌留精銳三千餘名並選千餘人隸臣楚軍以分其勢至該逆石達開及賴蘊新等擁衆數萬尙在武緣遣黨往攻南甯府城疊經左江道吳德徵左江鎮色克精阿督兵奮擊殲斃萬

餘該匪復分撲遷江之良塘忻城土司之七峒  
勢已窮蹙靡騁亟應前擱後躡會合埽除卽選  
道劉坤一久歷戎行素爲軍中信服臣飭令馳  
赴柳州大營統率全師會同總兵李明惠整飭  
部伍相機規畫一面攻取太平蕩平南路一面  
分兵渡河由閒道進屯忻城土司一帶號召慶  
遠思恩兩府團練進攻石逆以冀制其死命至

興安城守營把總蔣顯敷臨陣捐軀殊堪憫惻  
應懇

天恩優給卹典奏入得

旨蔣顯敷著交部從優議卹

欽定勦平粵匪方略卷二百五十三 庚申年

十月初一日 辛酉 曾國藩奏言據副將林保等稟

稱自甯國城中糧米罄盡已無生理將弁各官  
均請周天受出城徐圖再振周天受誓以身殉  
不肯出城黃昏時羣賊遙入旋即遇害署皖南  
道福咸當城破時出戰於南門街上身受二傷  
與甯國府知府顏培文宣城縣知縣王乃晉同

時殉難臣查已革湖南提督周天受堅守七十  
餘日援盡糧絕軍民愛戴城破身殉大節懍然  
其胞弟周天培去年在江北殉節胞弟周天孚  
本年在金壇殉節亦係堅守孤城力竭不屈一  
門忠義貞烈可風周天受應請開復原官照提  
督例從優

賜卹並請於甯國府建立專祠仍於四川省城及本縣

建立周天受周天培周天孚三人祠宇以褒忠  
義而昭激勸江甯巡道福咸所署皖南道缺業  
已另放有人猶能固守危城效死弗去應請與  
甯國府知府顏培文宣城縣知縣王乃晉暨竹  
塘殉節之署永州營遊擊副將朱景山均照本  
職從優議卹附祀周天受甯國祠內以慰忠魂  
至徽州之陷皖南道李元度旣不能穩修營壘



又不能堅守待援貽誤大局責無可辭道銜徽州府知府劉兆璜歙縣知縣羅德隆徽州營參將文芳身任地方均有應得之咎應請

旨將李元度革職拏問劉兆璜羅德隆文芳均行革職其打仗不力之候補參將鎮筸營遊擊楊鎮魁候補遊擊蕭以德守備鄒良佐都司姚才立均請革職都司銜孔旭日千總余大勝管帶親兵

敗不歸伍輕棄主將請

旨卽行正法以肅軍律至叢山關力戰陣亡之同知童  
梅華守備張斐文均請交部從優議卹奏入

上諭內閣曰已革湖南提督周天受力守甯國危城七  
十餘日糧盡援絕誓以死守於城陷時遇害署皖南  
道福咸巷戰受傷旋即殉難甯國府知府顏培文宣  
城縣知縣王乃晉亦皆同時殉難均堪憫惻周天受

著開復原官照提督例從優賜卹並於甯國府建立  
專祠其胞弟周天培上年在江北殉節周天孚本年  
在金壇殉節亦係堅守孤城力竭不屈一門忠烈大  
節懍然著於四川省城及本縣建立周天受周天培  
周天孚三人祠宇以褒忠義而照激勸江甯巡道署  
皖南道福咸甯國府知府顏培文宣城縣知縣王乃  
晉竹塢營殉節之署永州營遊擊副將朱景山均各

照本職從優議卹附祀周天受甯國專祠以慰忠魂  
至徽州之陷皖南道李元度不能堅守待援以致貽  
誤大局責無可辭徽州府知府劉兆璜等身任地方  
均有應得之咎皖南道李元度著革職拏問徽州府  
知府劉兆璜歙縣知縣羅德隆徽州營參將文芳均  
著革職其打仗不力之遊擊楊鎮魁候補遊擊蕭以  
德守備鄒良佐都司姚才立均著革職都司銜孔旭

日千總余大勝敗不歸隊輕棄主將均著卽行正法以肅軍律其叢山關力戰陣亡之同知童梅華守備張斐文均著交部從優議卹

同日劉源灝奏言查竄踞獨山粵逆近日仍屯紮城內裹脅鄉民漸次擾及平浪其定番一股亦在四鄉擄搶並分股攻撲長寨羅斛等處意欲糾合獨山股匪併力內犯經臣派令署都勻

府吳德容等分帶團練環攻以截其上竄之路  
並飭署大塘州判李崑督團迎勦使兩股逆匪  
不能會合惟古州鎮巴揚阿署安順府葉如松  
兩軍僅能扼守青巖雖屢次催令進勦深慮兵  
練單弱莫能遏其兇鋒不特省門喫緊且恐入  
川大路爲粵逆所擾已咨署提臣田興恕統帶  
勁旅迅速赴援

同日李若珠奏言九月十四日江陰敗匪復由常熟勾結賊黨擄船由石橋灣等處分竄北渡總兵周希濂等各率師船開礮轟擊施放噴筒火箭登時燃燒賊船五隻擊沈賊船十餘隻傷斃賊匪百餘名賊勢不支退回港內臣以江陰甫經克復下游師船單薄當令總兵李德麟管帶師船馳往會剿十五日甫抵江陰縣境卽見

小河各口賊帆紛紛出竄周希濂等正駕船抵禦李德麟奮力衝殺自卯至巳鏖戰三時之久擊壞賊船二十餘隻斃賊無算該逆抵死不退適候補道徐曉峯派知縣齊在鎔等親帶團練管駕巡船數十隻飛抵南岸大小師船回環轟擊又燒燬賊船七隻奪獲三隻賊始回船遁入奔牛一帶河內據探敗回逆匪復勾結金陵悍



賊四萬餘人又糾集九洑洲等處船隻三百餘  
號意圖下竄臣當派副都統海全等帶馬步隊  
四千餘人由瓜州一帶會合儀徵團練馳往堵  
禦一面飛咨總兵黃彬等各駕師船趕赴上游  
會合進剿十六日賊已竄至東溝一帶江面賊  
船亦連檣下竄官軍突騎直出槍礮環施把總  
程耀翥等首先衝入賊圍立斬執旗黃衣賊目

一名賊衆驚潰層啟輪揮隊夾攻我軍奮勇爭先冒雨跟追直至六合之青山銅山地方賊屍枕藉接應賊船復經黃彬等師船截勦落水淹斃者無算該逆屢撲屢敗此次水陸約期下竄又經官軍痛加勦滅其伎倆殆止於此所慮秋末冬初高郵邵伯諸湖水勢日枯難保不由麥塘等橋希圖偷渡該處原駐黃開榜礮船經袁

甲三抽調四十隻前往臨淮助剿現已不敷防  
範臣卽於上游師船一百八十餘號內以四十  
餘號派歸李德麟帶往狼福兩山分別駐紮以  
四十餘號派歸吳全美帶往儀徵協防以二十  
餘號由黃彬隨帶爲長江策應之師又以千總  
文錦濤所帶划船二十餘號協助鞠耀乾所駐  
口岸此外仍留千總魏麟彪等長龍划船五十

聞

餘號暫紮瓜州如高郵邵伯有警卽由臣飛調  
前往會同黃開榜礮船協力堵剿均奏入報

初二日壬戌略秉章奏言粵西之賊由永明擾及

道州江華時周達武王永章李金暘三營分駐  
蔣家嶺等處堵截八月初八至十六等日該逆  
分股由龍虎關竄越周達武等聯絡分布會同

團練擣頭迎勦初八十一兩日遮擊於玉田村  
斃賊數千賊目陳浚昇等棄械投誠約四千人  
資遣回籍者三千餘衆挑留精壯四五百人責  
令效力自贖十五十六日邀擊於古子江督率  
降卒直前衝擊而團練自後圍裏斃賊尤多由  
是石逆所部左旗後旗賊黨無一脫者此次粵  
匪注意湖南爲竄擾江西之計周達武等以少

上從之

擊衆奮勇立功各屬鄉團隨同官軍掃除悍賊  
在事員弁兵勇及官紳團練均屬著有微勞可  
否由署撫臣翟誥擇尤保獎以示鼓勵奏入

初三日癸亥翁同書奏言逆首陳玉城於九月初

七八兩日竄至壽州南路繆家橋一帶其衆分  
爲三股一回定遠一走廬江一赴六安與廬賊

會合連營百餘里兵勇團練邀截擒斬甚衆解散被脅民人不下數千旋據駐六安之總兵吉順惠成呈稱廬州粵逆先抵六安城外吉順督帶將弁會同營總常海堅守城外各營惠成協同署知州鄒筭登陴固守初八日賊來愈衆撲近城濠吉順等密飭將弁帶領馬步數百繞出賊後營中復出隊夾擊立斬黃衣騎馬賊目一

名賊始驚竄我軍乘勝斬馘無算等語臣思該  
逆分屯百里當以奇兵掩襲使首尾不能相顧  
則城圍自解密派參將鄭昌林等督帶馬隊冒  
雨疾趨由衆興集橫衝而進一面函致吉順等  
嚴密固守俟水陸援師到齊約期夾擊嗣據吉  
順等呈稱自初十日後陳四眼狗親率悍賊日  
夜圍攻舒城粵逆亦由南路響應屢次衝撲悉



被我軍擊退十七日我軍礮船行抵鮑家灣出賊不意折戟衝擊立將該逆浮橋拆毀吉順惠成等知水師獲勝卽派遊擊聶桂榮等帶隊衝擊南路賊營知州鄒筭等帶勇衝擊東北賊營遊擊陳松等帶勇直擊正東賊營又派主事阿克達春等帶領練勇從大橋畝繞赴賊後輔以常海馬隊同時並發賊見四面火起不知我兵

多寡紛紛棄營逃竄我軍槍礮堦擊逆屍枕藉  
敗賊欲渡河西竄又被水師轟斃不計其數賊  
衆失措由雙橋集奪路而去我軍踏毀賊營二  
十餘座追殺數十里砍獲長髮首級七十五顆  
生擒六十五名訊據擒賊供稱此次粵逆數萬  
一股由霍山直犯楚師一股欲竄麻城繞出楚  
師之後幸被我軍出奇擊破又聞援師大至賊

勢不支悉向東南遁去臣查前此陳玉城率衆二十餘萬圍撲壽州竟能悉數擊退已屬意外迨該逆分股南竄六安形勢遠遜壽州加以地方凋殘糧食缺少正深焦慮乃吉順惠成等竟能以少擊衆大挫兇鋒城圍立解此皆仰賴

皇上天威將士用命總兵吉順請

賞還提督銜惠成請

賞加提督銜其隨勦出力之協領常海請

記名以副都統用遊擊陳松請

賞加勇號聶桂榮請免補遊擊以參將儘先補用並

賞加副將銜候補同知署六安州知州鄒筭請

賞換花翎並加知府銜其餘在事出力員弁兵勇可否

由臣擇尤酌保以勵戎行奏入

上諭內閣曰官軍擊退大股粵匪六安城圍立解勦辦

尙爲得手在事尤爲出力之總兵吉順著賞還提督  
銜惠成著賞加提督銜委營總常海著記名以副都  
統用遊擊陳松著賞給懋勇巴圖魯名號候補遊擊  
聶桂榮著免補遊擊以參將儘先補用並賞加副將  
銜署六安州知州鄒筍著賞換花翎並賞加知府銜  
其餘在事出力之將領員弁兵練並著該撫擇尤保  
奏候朕施恩

初五日乙丑巴棟阿奏言臣自夏閒染受暑溼醫

治未痊刻下精神漸覺委頓每當籌商公事輒  
覺頭暈神昏若不靜心醫調久則更恐難治惟  
有額懇

天恩賞假一箇月俾臣得以安心調理其江甯將軍事  
務京口副都統印信均暫交魁玉署理以免貽  
誤至鎮江一切軍務全局攸關最爲緊要若無

督辦大員未免無所責成查提督銜甘肅西甯  
鎮總兵馮子材號令嚴肅謀勇兼優於軍務事  
件頗爲練達臣擬將軍務日行事件均交馮子  
材接管遇有緊要事務臣仍與之商酌辦理仰  
懇

皇上天恩將鎮江軍務

飭派馮子材督辦以專責成奏入

上命軍機大臣傳諭巴棟阿曰巴棟阿現在患病著賞  
假一箇月在營調理其江甯將軍事務京口副都統  
印信著魁玉暫行署理惟鎮江郡城三面皆賊防勦  
一切萬分喫緊旣據巴棟阿奏稱馮子材謀勇兼優  
所有鎮江軍務卽著馮子材督辦以專責成遇有緊  
要事件仍著與巴棟阿和衷商辦以期日有起色

初六日

丙寅

巴棟阿奏言據已革高州鎮總兵蕭



知音到鎮呈稱該鎮自本年三月調防金壇嬰城固守曾於夜巡之際被賊槍傷右手後因接仗骹受矛傷均未敢藉詞偷安稍涉貽誤奈日久奸生守備馬得勝外委王文榮等忽萌異志暗與賊通七月十六日賊匪乘霧攻城縣城被陷該鎮督隊捍禦被賊擡礮打傷昏暈倒地遇救得生等語臣派遊擊文漢章驗傷屬實伏思

聖裁

該鎮嬰城固守已歷四月有餘其況瘁辛勞誠不可泯惟因內應失陷亦有應得之咎應如何辦理之處出自

巴棟阿又奏言前由金壇潰出之遊擊朱正華等帶領各起兵勇二千數百名於七月十八日到鎮恐真僞莫辨未准進城概令駐紮城外查

明潰出兵勇內有楚勇四百三十餘名原係江北派往自應准其仍回原防已咨明李若珠查照其餘各勇商同馮子材派副將馮日坤等前往查驗共一千五百餘名內有川奮勇一百七十餘名適 臣 欽奉

諭旨如有川奮勇逃至鎮城責令各營將弁隨時查出卽行正法自應欽遵辦理惟據管帶該勇之都司葛

春陽瞿先仲千總王得高劉太和把總馬天魁  
丁學紅縣丞謝炳南等會稟川奮勇原有四百  
名賢愚不一其在金壇投賊者均屬不法之徒  
此次潰圍到鎮者實係安分之勇委無不軌情  
形如有奸宄溷跡該都司等情願坐罪並出具  
切實甘結前來臣覆查無異因會商馮子材寬  
其一死酌量給資遣散所有管帶各官實因力

續通志卷之三十三  
竭計窮勢難抵敵不得已潰圍而出幸獲餘生  
可否仰懇

天恩從寬免罪其投賊之守備馬得勝外委王文榮實  
屬罪不容誅應請

旨先行革職俟拏獲時卽行正法以昭炯戒奏入  
上諭內閣曰已革廣東高州鎮總兵蕭知音於營員馬  
得勝等暗與賊通未能先事覺察以致金壇縣城失

陷實有應得之咎姑念其調防該縣嬰城固守已歷四月有餘衝鋒接仗身受重傷尙非有心貽誤蕭知音著免其治罪留於鎮江大營效力其餘帶勇各員都司葛春陽瞿先仲千總王得高劉太和把總馬天魁丁學紅縣丞謝炳南等均著免其治罪撤歸原營其通賊在逃之守備馬得勝外委王文榮均著卽行革職嚴拏正法以昭炯戒

初九日己楊載福奏言七月十一日遊擊趙三

元帶領哨船進赴池口見池城之賊擄船設卡  
趙三元會合遊擊陳代友各帶礮船徑趨池州  
該逆見水師將近出隊千餘人抗拒趙三元陳  
代友指揮各船開放排礮賊退入壘當將該逆  
所擄划船概行焚燬並帶弁勇登岸焚燒卡壘  
該逆復於青溪關設卡築壘停泊划船百餘號

八月二十五日趙三元帶隊往勦賊衆抵禦我軍開礮轟擊殲斃甚多遂將該處卡壘踏平並追獲划船五隻燒燬划船數十號又據黃翼升稟稱七月二十一日大股逆賊突至塘田等處意圖上竄黃翼升帶領三板船駛入內湖將該處木橋拆毀斷賊上竄之路二十二日該逆盤踞山頂排插五色旗幟黃翼升帶隊衝撲賊衆



驚潰查塘田爲張溪鎮上下要路時有賊蹤往來九月初七日黃翼升督船往剿進攻張溪賊出步隊千餘騎賊數千彙集河岸迎戰黃翼升揮令各船開礮對擊自寅至午鏖戰五時之久斃黃衣騎賊一名步賊數十名餘衆望葛家村退走臣查池州之賊時思竄襲東建臣與彭玉麟現仍飭令各營嚴密防剿以期節節掃蕩克

復池城奏入報

聞

初十日庚午瑞昌王有齡奏言九月初三日徽州

之賊由淳安竄至嚴州大旗山適副將周萬遠  
抵嚴卽督隊接仗斃賊多名初七日大股麕至  
周萬遠帶領都司范彪等在七郎廟堵禦賊衆  
我寡被賊包抄守備邵安邦力戰陣亡並見嚴

郡城門洞開知奸匪已入我軍勢難抵敵不得已暫退七里瀧再圖整隊前進丁憂知府松海知縣李長齡出城隨剿不能回城均退赴張玉良軍營署嚴州協副將封九貴出城堵禦手刃逆首一名被賊四面圍住力竭陣亡查嚴州上連衢郡下通杭垣實爲全浙咽喉今突被該逆竄陷殊有防不勝防之慮現咨會國藩速撥勁

旅繞道來浙援應並另派一軍與浙師約會兩  
面夾攻又咨催福建江西調派兵勇來衢以扼  
上竄一面令都司張培基等分帶礮船駛赴嚴  
江隨同張玉良攻勦以扼下竄現接張玉良咨  
稱初九日督隊前進甫至烏石灘地方卽有賊  
千餘在彼築卡當派副將劉萬德等舍舟登岸  
迎頭抵擊復派都司陳嘉泰等分爲左右兩翼

抄襲賊後該逆復以大股接應劉萬德等奮力  
勦殺賊勢漸卻未幾大雨如注賊船連檣而來  
卽令周萬遠列陣兩岸陳永椿等駛駕戰船冒  
雨直前將該逆新築頭卡踏毀賊船敗退我軍  
乘勝尾追奪獲賊船四隻旋卽收隊趕集陸軍  
立圖進取臣查該逆受此懲創亦足稍戢兇鋒  
惟大雨不止我軍陸路難行且山水江湖同時

並漲師船逆流而上亦多遲滯能否迅速克復  
尙難豫定所有陣亡之署嚴州協副將封九貴  
應請

旨交部從優議卹以慰忠魂並請將丁憂嚴州府知府  
松海署建德縣知縣李長齡一併革職責令隨  
同進剿以觀後效其餘陣亡及失守各員容俟  
查明另行分別叅辦奏入

上諭內閣曰賊匪竄陷嚴州現經瑞昌飭令張玉良等各軍水陸並進著卽迅速進攻毋任滋蔓陣亡之署嚴州協副將都司封九貴著交部從優議卹以慰忠魂丁憂署嚴州府知府松海署建德縣知縣李長齡均著先行革職仍責令隨同進剿以觀後效其餘陣亡及失守各員並著該將軍等查明分別辦理

瑞昌王有齡又奏言據趙景賢稟稱派都司武

業祥帶領礮船十隻駐紮塘棲復分派礮船二十隻一至小溪口扼其中路一往梅溪扼其前路而以陸路兵勇繼之會同和平鎮等處民團分投堵剿九月初五日揀派局勇民團與賊接仗擊斃賊匪五六百名賊卽竄回四安堅守新橋併力抗拒初六日各處民團彊擁而至賊始聞風遁去旁竄梅溪經師船開礮轟擊賊衆驚



潰各民團又在陸路會剿斃賊一千餘名餘匪  
仍回四安原路退過新橋兵團追殺又斃賊千  
餘名生擒六十餘名奪獲旗幟馬匹無算又據  
東路探報該逆占踞平望日在鴛鴦湖操演礮  
船梅堰一帶時有賊船出沒並聞宜興聚賊甚  
多時思竄撲夾浦是湖郡東西兩面均須嚴防  
等語臣查浙東賊氛方熾杭紹金衢四郡同時

聞

戒嚴斷無餘力兼顧湖郡現仍札飭趙景賢激勵將士聯絡鄉團實力堵剿奏入報

十一日辛未薛煥奏言江陰縣城陷後逆璽時思

北竄又因常熟昭文不守賊氛聯爲一片江防益形喫緊臣僻處海隅無兵可調當飭長江水師並會同臣龐鍾璐嚴飭沿江沿海各州縣認

眞團練以防爲勦並因靖江縣與江陰僅隔一江飭令知縣齊在鎔相機進攻嚴防北竄九月初三日齊在鎔會同遊擊郭定猷等駕坐巡船駛至南岸適該逆由內河用木簞裝載乾柴並駕礮船行至黃田港經艇師開礮轟擊將木簞礮船擊毀齊在鎔等分撥兵團登岸先將城外礮臺奪獲初四日署常州府知府平翰等帶領

兵勇抄入東門賊匪并死抗拒我軍攔頭迎擊  
將城中存逆擒斬淨盡當將縣城克復等情臣  
查江陰縣城被賊兩次踞擾城中糜爛不堪此  
次因賊匪折赴上游餘賊無多用能一戰而克  
難保不乘間回擾亟應加意嚴防現飭藩司遴  
員署理縣事妥辦善後事宜並飭齊在鎔督率  
民團協力防守所有在事出力人員仰懇

天恩容臣查明酌保奏入

上諭內閣曰賊匪竄踞江陰縣城經靖江縣知縣齊在  
鎔等統帶艇師及兵勇民團將內河賊匪木簕礮船  
轟燬並將城外礮臺奪獲九月初四日兵勇抄入東  
門將城中逆匪擒斬淨盡立將縣城克復所有在事  
出力員弁著准其擇尤保奏以示鼓勵

十三日

癸酉

慶端瑞瓚奏言逆匪分股竄入溇安

浙東衢嚴一帶萬分危急衢州駐紮閩兵共一千七百餘名仍形單薄該處向以徽州爲屏蔽今藩籬盡撤設衢州復有疏虞不特入閩援師咸爲牽掣浙省更形孤立是力顧衢州卽以保浙省後路前派總兵曾玉明統帶臺灣漳州兵勇三千名赴杭援剿茲徽甯不守賊勢變遷浙東軍情繫於浙西不得不先其所急臣等已飭

曾玉明速統所部疾趨衢州一帶確探賊蹤迎  
頭堵剿並添募建甯壯勇六百名平江壯勇五  
百名剋日赴衢以資調遣

慶端又奏言閩省援浙兵勇先後調派已至一  
萬餘名現在汀邵建甯各郡均須設防實無得  
力之軍可以再調衢州爲三省門戶設被竄越  
江閩均形震動查有江西吉南贛甯道升任福

建臬司林福祥所部兵勇均係久歷戰陣應請  
旨飭下毓科於林福祥所部各軍內抽調二三千名遴  
委勇幹員弁管帶馳赴三衢會同閩省官軍確  
探逆蹤合力堵剿以顧大局奏入

上命軍機大臣傳諭毓科曰現在浙江嚴州府城已被  
逆匪攻陷情形危迫待援孔殷閩省援浙兵勇已先  
後派往一萬餘名勢難再行續調升任福建臬司林



福祥現在江西帶兵素稱得力著毓科迅飭林福祥  
於所部兵勇內抽調二三千名派得力員弁管帶星  
馳赴浙援勦固三衢之門戶卽以保豫章之藩籬務  
當不分畛域趕緊籌辦毋得遷延推諉致誤事機

十六日丙子薛煥奏言據派攻青浦之總兵曾秉

忠副將向奎稟稱九月二十四日水陸會攻青  
浦曾秉忠先帶長龍師船攻取朱家角地方燒

燬賊館奪獲賊船並擒斬僞帥楊廣春一名餘  
匪潛遁該總兵一面派船防守一面親率各船  
進抵青浦城外督攻西南兩門賊卡向奎督攻  
東南兩門賊卡該逆糾衆抗拒我軍水陸攻擊  
鏖戰四時傷斃逆匪無算餘匪遁入城中當將  
東西南三門外賊卡一律踏毀惟城上逆賊甚  
多曾秉忠向奎親督各隊奮勇攻城歷三晝夜

之久該逆負嵎死守城上槍礮如雨曾秉忠向  
奎均被槍傷暫時收隊又據派防寶山之參將  
李廷舉等稟稱九月二十六日大股逆衆麕聚  
羅店等處該參將等揮隊而前四面環擊轟斃  
逆匪多名賊衆皆向嘉定竄遁等情臣查此次  
曾秉忠向奎水陸進攻青浦雖城池尙未克復  
業已大獲勝仗足挫逆鋒而李廷舉等擊敗羅

店大股逆衆均極奮勉出力惟探聞該逆有復  
糾崑山蘇州逆衆來援之說業由臣飭該鎮將  
等嚴密堵剿一面籌添兵勇分往助攻以期迅  
復青浦嘉定二城查曾秉忠前經臣奏奉

諭旨摘去頂戴向奎亦經巴棟阿奏請革職今該二員  
偪攻青浦勇往直前不避危險仰懇

天恩將提督銜汀州鎮總兵曾秉忠

欽定四庫全書  
欽定平定回疆方略卷五十三  
三十八  
賞還頂戴並將漕標副將向奎革職處分

恩予開復俾知鼓勵而圖奮勉奏入

上諭內閣曰總兵曾秉忠副將向奎自被叅後均極愧奮九月間督兵進攻青浦歷三晝夜將城外賊卡全行踏毀斃賊無數該總兵等均受槍傷尙爲奮勉出力提督銜汀州鎮總兵曾秉忠著賞還頂戴記名總兵漕標副將向奎前叅革職處分著准予開復

同日李若珠奏言據探天長六合要路及儀徵西北鄉均已設有賊卡九月二十九日儀徵西門外火光四起參將孫之友親帶百餘騎馳往查探甫出西門賊已抵胥浦橋之北孫之友策馬據橋以槍礮擊之參將李有才等帶隊趕到會合迎勦孫之友陣斬黃衣賊目一名賊勢稍卻臣復派副將詹啟綸等分帶兵勇隨後接應

三十日賊分股竄至謝家集等處約有二萬餘人詹啟綸令孫之友等驟馬直前銳不可當該逆分左右兩翼包抄我軍李有才首先衝突砍倒執旗賊目二名賊卽紛紛回竄我軍追至青山銅山地方知縣楊鍾琛督帶團練攔頭截住賊向山僻奪路奔竄墮馬落崖者不計其數十月初四日該逆馬隊二千餘騎已抵甘泉山下

龍袍洲大股賊匪亦傾巢出撲臣派副都統海  
全統帶全部馬隊馳往抵禦參將蔣臨照等各  
帶勁勇在要路攔截一面派詹啟綸督同孫之  
友等從儀徵小路直抵龍袍洲賊巢使其首尾  
不能相顧該逆恃其馬隊往來衝突我軍堅立  
不動乘懈進攻適詹啟綸一軍已近賊巢該逆  
勢欲回顧捲旗倒退各路兵勇會合跟追立將



謝家集各處賊卡全行燒燬追至龍袍洲一帶  
江岸另有賊匪四五百人接應該逆回巢負嵎  
死守臣仍督同各鎮將加意整飭相機迎剿並  
知照上下游水師一體嚴堵奏入

上諭曰此次獲勝自係賊壘尙未堅定若再有大舉必  
以全力撲犯著嚴督剿辦勿令下竄一步

李若珠又奏言接漕臣王夢齡函稱天長賊匪

聞

已在下五莊地方搶去大小船二百餘號欲由  
湖面分竄高郵邵伯各處臣亟將前紮瓜州之  
師船五十餘號調至揚州以便隨處策應並知  
照原駐高郵之總兵黃開榜與原駐邵伯之總  
兵王萬清督飭戰船一律嚴爲布置毋使偷渡  
奏入報